


# BAHIBURI,

## UNTU GWAKIBILI <sup>2</sup>

 . . . isa ikyākwànda, kangi fūnda a Masimbo, ukuti umwēne ābagile ukufūnda ikyēne kāngi ābagile ukukēta kali ikyēne kyāli Bwānalōli pammo mma. Umwēne ālyēgile ikyēne, u Bwānalōli, ukwisila mu Lwītikāno Ulukūlu. Lilino, Pauli āli mfunda Lwītikāno Ulukūlu. Balinga bamenye ikyo? Umwēne āmanyisígwe pāsi pa yumo mwa bamanyili ukukinda-bōsa aba lisiku lyāke, Gamalieli, umfunda ugwapamwanya. Kangi Pauli āmenye u Lwītikāno Ulukūlu. Kangi une ngwinogona ubwāke ubuyugānio ubwakwānda, bo une nāyobile ulubunju ulu, akabalilo kāko umwēne ābīkīl'ubukēti bwa bufwe bwa Stefani. Ikindukimo kyābagile ukuya kyālinkolile u Pauli, panongwa yakuti mosa mu busimbe bwake umwene alinkumilisa ukusōsola ku kyene, “Une ngaya gwakufwana, panongwa yakuti une nafwīmīle i Kipanga ku bufwe. Une ne nnini fiyo pakati pa bēne.”

<sup>95</sup> O, loli Kyalā ālinalyo i līnogono ilikīndane lya ikyene. Umwene āli yumo mwa banyambala abāmāka ukukinda-bosa aba lisiku lila.

Kēta Mwikemo Pauli, u ntumigwa unkulumba,  
Nu nselekesye gwāke mmulike fiyo kāngi  
mwēlu, (u mwāti alinkuyoba.)  
O, kula ko nalōli kukuyaga ukuywēga kumo  
Akabalilo kako uswe twesa tukwagana Kula.

I Lisiku ilikulumba lila akabalilo kāko une ngumbona umwēne ikwāmbilila i ngiga ya u mfwīla, umfwālo gwa u mfwīla!

<sup>96</sup> Une nālīmīle kufuki pa kabaga akanini akaiyolo, apa pakaya patali mma, pāpo umwēne āsīmibile a Makalata aga. Kangi polelo abēne balinkutumūla untu gwāke ukusōsyāko. Kangi ukunsopa umwēne mula nkati mmafi, ukusuka ukusuluka mmafi. Kangi unnini unJuda uyu pala, umwēne alinkuti, “Une ngupīmba mu mbili gwāngu ifing'wale fya Yeso Kristi. Une ndwīle ni finyamana ku Efesi, lōli une ndwīle ubwīte ubununu. Une mmalīsīsyē injila. Une ngyūngile u Lwītiko. Kangi ukufuma apa, kula kulāmbalikigwe kuli une i ngīga ya bugolofu, iyi u Ntwa, u Ndongi ungolofu, isakumbaga une pa Lisiku lila. Kangi une nimwene mma, loli bosa aba bakuganile ukubonekela Kyake.” Mumo une nkiganiile ikyo! O, une ngulonda ukubaligwa na bala! Uswe twalisibile ukwimba ulwimbo:

O, ngimba ugwe kubaligwàga ukuya yumo gwa kibaga Kyàke?  
 Ngimba ugwe kubaligwàga ukuya yumo gwa kibaga Kyàke?  
 Yaga nsitakatōndobya nkati, yaga gwākukētésya nukugúlíla ubukētelo bula ukukēta;  
 Umwene ikwisa kangi.

<sup>97</sup> Une ngulonda ukuya yumo gwa bēne. Lilino u nsĩmbi ikukĩndilíla, ukuyoba:

*Polelo uswe tubagile ukupa... u bwĩngipo ubupiliko ubwānalòli ku findu ifi uswe tutalile tupilike, tusulwe pa kabalilo kalikōsa uswe tufilekelesyègwe ifyène ukuselemuka.*

<sup>98</sup> Mũmo uswe tumanyĩsye pa ikyo, ulubunju ulu, ilinandi lya 2 likubōmbéla, “Linga...”

*Kabuno linga i lisyu lyāyobigwe na bāndumi...*

<sup>99</sup> Ngimba uswe tukusyaga fyofiki a bāndúmi ukuya? Basololi. “Kyala āyobile mu kabalilo akakindanekindane...” Lilino, ugwe kufimbilisigwa ukutendeka, komma aminogono gitu twĩbene, loli i Bangeli. Lilino untu gwa 1, ugwa...untu gwa 1, amanandi ga 1.

*Kyala, uyu ntubalilo utwaiyolo...mu njila ingindanekindane aayobile...ku ba tata ukwisila mu basololi,*

<sup>100</sup> Lilino umwene ikubuka ukukilania kuno, nu kuyoba kangi.

*Kabuno linga i lisyu ili lyāyobigwe na bāndumi gāli lĩmikigwe,...*

Kangi ngimba u gwāndúmi kikusanusya fiki? “Ntumigwa.” Linga umpakígwe ntumigwa gwa Kyala...Kangi polelo linga uswe tukuyaga bapakígwe, uswe twe batumigwa ba Kyala. Uswe tuli batumigwa ku kisu, u mwimilili gwa Kumwanya, ukufumusya ukuti uswe twe bendanjila kangĩ bahesya. Uswe tukaya ba kĩsu iki mma. Lōli uswe tukulōndesya a Kāya aka kakwisa, kākō u Njengi nu Ntēdeki yo Kyala. Uswe tutikwāla umma lōsa ifyūma pa kĩsu iki, kũko banyāmbuta bikubōngotolèla nkati, kangĩ abākōbyo, ingami, nu kubola. Kabuno, ifyuma fyitu filambalele Kumwanya, kuko Yeso itugesye ku kiboko ikililo ikya Lwimiko. O, kyo kiliku ikyalwimiko kangĩ ikindu ikiswigisye nki, ukumanya ikyo:

Isũbilo syĩtu siyèngigwe pa nakimo ikinĩnipo  
 Ukukinda i Lilopa lya Yeso nu bugolofu;  
 Akabalilo kako ukusyungutila u moyo gwangu  
 gukupa injila,  
 Polelo Umwene yo lusubilo lwangu losa  
 nukwitugasya.

Pa Kristi, i Lyālabwe ilikafu, une ngwima;  
Ifisu fyosa fyo misanga yakwibila,  
Ifisu fyosa fyo misanga yakwibila.

<sup>101</sup> Mumo Eddie Perronet āsimbile ulwimbo lula, nkabalilo ka kufwimigwa!

Lilino, *linga i lisyu lyāyobígwe na bāndúmi lyāli lyīmíkigwe*, . . . (Akabalilo kāko u ntumigwa gwa Kyalala āyobíle i Lisyu, Ilyene lyālimile.) . . . kangi ikyākwāmbilila kilikyōsa *kyālyāmbilile ubupyānikisyo ubugolofu bwa kyākwāmbilila*;

*Ngimba uswe twisakubopága bulebule lilino, linga uswe tutukupilika Kristi, Yūyo ikuyoba ukufuma ku Mwanya?*

Lilino kētésya:

*Ngimba uswe twisakubopága bulebule, linga uswe tukusūla ubupoki ubukulumba fiyo; . . .* (Inogona isya ikyēne.) . . . *ubu mu pa kwānda bukwānda ukuyobígwa na Ntwa, . . .*

<sup>102</sup> Kristi andaga ukubomba imbombo Yake. Ngimba Umwene ābombile fiki? Uswe tukunketesya Umwene, mumo Umwene . . . gwakwiwīsyā, gwapasi, mumo Umwene akāli nnyambala unkulumba umfumuke mma ukuya u mbalakyala. Loli Umwene aali gwakwilambika, gwakwibikapasi, mololo. Umwene akaali ndumbilili gwamaka mma. Amasyu Gake gakalipilikigwe mu lukindi.

Loli Yohani alinkusooka panja ukuya ngalamu iyakubuna. Umwene aali ndumbilili.

<sup>103</sup> Yeso ikwisa panja, komma ukuya ngalamu iyakubuna, loli Kyalala ikubomba nu Mwene, ukusisimikisya i Lisyu. Kyalala āli na Kristi. Peteri āyobíle, pa Lisiku lya Pentekosti, “Umwe banyambala ba Israeli, kangi umwe mwe mukwitugasya mu Yudai . . . Yeso gwa Nazareti, u Nnyambala asisimikisigwe na Kyalala pakati pa umwe, ukwisila mu fimanyilo ni fiswigo ni fika, ifi Kyalala ābōmbíle ukwisila mwa Umwēne, pakati pa umwe mwēsa, iki umwe mwēsa muli bakēti.” Ketesya mumo umwene ākikomelile ikylene pasi pa bene. “Umwe mwabagisenie ukumanya Umwēne.”

<sup>104</sup> Yeso átile, “Umwe basyobi.” Alinkuti, “Umwe mukubuka panja kangi mukuketa ilisuba, kangi umwe . . . Ukwēne kukesefu kangi kwamabingo, umwe mukuyoba, ‘Ukwēne kukuyaga kabalilo kabibi.’ Kangi linga ukwēne kukumulika kangi kwalisuba, pamo bo ikyo, umwe mukuyoba, ‘Ukwēne kukuyaga kabalilo kanunu.’” Alinkuti, “Umwe mubagile ukumanyilangāni mmwanya, lōli ifimanyilo fya kabalilo, umwe mukabagila ukulingania. Kabuno linga umwe mwālimenye Une, umwe angali mumenye ilisiku Lyangu.”

105 O, fiki Umwene āngàli ukukuta ikilo iki. Mumo u Mbepo Gwake ikukuta ukwisila mbalumbilili Bake, “Isala yili kifuki!”

Uswe tukuketelélangani. Uswe tukukētésya ama bomu ga atomiki. Uswe tumenye uyu ikuyaga pakwēga ubuyo bwa Clark Gable, kangi ywāni ikuyaga ukubōmba *iki, kila*, pamo i *kīngi*; pamo ywani isakuyaga u prezidenti-gwakibili. Uswe tukwikyela mu ikyo, loli uswe tukabagila ukumanya ifimanyilo fya kabalilo. Uswe tuli kubumalikisyo.

106 Ngimba kyo fiki ikyēne? Uswe tukwikyēlamo fiyo, “Go mutu guki unkōnge gwa televizioni? Kyo fiki Susie ikuyaga pakubōmba?” pamo yo fiki ingamu ya nkīkūlu yula. “Kangi kūgu Arthur Godfrey ikubūkako? Yo sūnga nki umwēne ikuyaga pakukwāba akabalilo akakōnge?” Uswe, ukuya Bakristi, tukumata ilīnogōno lyītu līsūle nu bubole bo ubo, akabalilo kākō uswe tubagile ukuya mu lwīpūto ubuyobumo, nu kufunda i Bāngēli, ukumanya ifimanyilo fya kabalilo aka uswe tulimo nu bumi.

107 Iki kikubōmba ikyo, utubalilo twīngi, fyo figemo ifyōnywa, uko ko kutalusya, ikyo kitikwisa pāsī nukutwala u Bwanaloli bwa Nongwainunu. Uswe tukufimbilisigwa ukwāmūla panongwa ya ikyo mmasiku aga gikwīsa. Uswe tulingasūlāga mma kalikōsa. Kangi abāndu, mūmo uswe tuyīlīle apa pa Branham Tabernacle, ukukéta i fimanyilo ni fiswīgo, na maka ga Kristi unshyuke ku bafwe; kangi polelo ukumanya ukuti uswe twābagile ukubīka utubalilo twītu—twītu pa fīndu ifīngi, nukusūla ukupilika i Lisyu lya Ntwa Yeso, “Ngimba uswe twisakubopāga bulebule, linga uswe tukusūla ubupoki ubukulumba bo ubu?”

108 Ilinandi lya 3, pamo ilinandi lya 4. Apa po pāpo uswe twāmalisīsye, pa linandi lya 4, ulubunju ulu.

*Kyala yōpe ikubīkīla abēne ubukēti, . . . (O, mwe!)*

*Kyala . . . ikubīkīla abēne ubukēti, . . .*

Pilikisya ku Lisyu.

*. . . fyosa-fibili ni fimanyilo . . . ifiswigo, kangi ni fika ifikīndane, . . .*

Ngimba *ifikīndane* ifika kyo fiki? Ngimba *ifikīndane* yo fiki? *Fikīndane* kokuti “fīngi.” “Ni fika *fīngi*, Kyala ābīkīle ubukēti.” O Kyala! Une ngusubila ukuti Ikyene kisakwiyubika mu ndumbula syinu. Pilikisya.

109 Une ndi yumo gwa batimi binu, nu Nkundwe Neville apa. Une ngulonda umwe ukwega Ilyene ku buketi. Ili Bāngēli lyāyobīle, “Linga pala pikufyūkapo yumo pakati pa umwe, kangi umwēne ikuyoba *kyakuti-na-kyakuti*, kangi ikyene kitikwisa ukuboneka, komma ukupilika ikyene, kabuno Une ngayobapo. Loli linga umwēne ikuyoba mu Ngamu Yangu, kangi iki umwēne ikuyoba kikwisa kukuboneka, polelo pilika Ikyene.” Ameni.

“Kabuno une ndi nu nsololi yula, pamo ndumbilili, kilikyosa ikyene kibagile ukuya. Linga iki umwēne ikuyoba kikwisa kukuboneka, polelo mpilika umwēne.”

<sup>110</sup> Lilino, binangu, unko uswe tumppilike Umwēne, u Mbepo Mwikemo ikuyoba pakati pitu, ukunāngisya ifika ifikindanekindane, ni fimanyilo, ni fiswigo. Unko uswe itolo tulingakīsaniāga Ikyēne ukuya itolo fiboneka fyāmwālwe. Unko uswe tukumbukile ukuti Ikyene yo Yeso Kristi, yulayula mmayolo, umwisyugu, na bwilanabwila; ukusisimikisya i Lisyu Lyake. Uswe tukufimbilisigwa ukubomba ikyene. O, ngulamba bomba ikyene. Pilikisya. Unko ikīndu kilikyōsa ikīngi kiyeye kyakibili, kōpe na kāya kāko, undumego, unkasigo, abāna bāko. Kilikyōsa ikyēne kibagile ukuya, kibika ikyēne kyākibili. Mbika Kyala gwākwānda. Ugwe kuyoba, “Nkundwe Branham, pamwanya pa bāna bāngu?” Pamwanya pa kalikosa. Mbika Kyala kyākwānda. Unko Umwene ayege ntāsi.

<sup>111</sup> Eliya asókilepo pa kyamba, ilisiku limo. Umwene aali yo gwāndūmi, untumigwa, ntumigwa gwa Kyala, apakigwe. Kangi umwene alinkummwaga unlikulu umfwilwe ikupimba imbabu sibili. Umwene alinkuti, “Buka, kangalangile une akasyesye akanini, kangi kandondele une utwisi.”

<sup>112</sup> Kangi umwēne alinkuyoba, “Bomūmo umōyo gwāko mūmi, une ndina itolo lōli utusyēsye twākufwāna, pamo ubufu bwa ngano ukufwāna, ukutēndēka akasyēsye akamulwāngābya kamokene akanini. Kangi une ndinago itolo amafuta gākufwāna ukubūka mula, ukufulugania ikyēne mōsa, ukuya mbupimba. Kangi une ngusala imbabu sibili.” Injila yayiolo yāli, iyene yo njila ya kiMwēnye, iya kupīngāsya imbabu nu kwāsya ikyene ukufuma pakati, kangi ukūmilisya ukugutila ikyēne nkati. Ndēndike mwīngi u mōto gwa kubugonelo bo ugwēne. Alinkuti, “Kangi une nguyaga pakupiya akasyesye kala ka une nu ndūmiana gwangu, umwanangu. Kangi uswe tukukalyaga akene nu kufwa.” Lwālipo ulumu ku fyīnja fitatu ni myesi ntāndātu, kisita mīsi nakumo.

<sup>113</sup> Yula umūmilisi, unsololi unkāngāle, alinkukēta u nkīkūlu yula mu kisyo. Umwēne alinkuti, “Būka, kāngalangile une a kasyēsye ikyākwānda.” Bo bulagili buki, kuli u nyāmbāla ukumbūla u unkīkūlu umfwilwe, ikufw’injala ku bufwe, ukunswila umwēne ikyākwānda. Ngimba umwēne āyobīle fiki? “Kabuno ISI SYO IKUTI U NTWA, indeko yitisa kuya bwāsi, pamo akapake ukukamuka, mpaka Kyala ikutuma ifula pa kisu.”

Ukwanda, Kyala. Umwēne alinkubuka nkati nukutendeka akasyesye kala, nu kwisa ukumpa unsololi. Alinkubūka mulamula ukugomokela nu kwēnga akāngi kala, kangi akāngi kala, kangi akāngi kala, kangi akāngi. Kangi indeko yikābūkilēmo siku nsitakāndu, pamo akapake ukukamuka, mpaka Kyala ātumile ifula pa kisu. Umwēne alimbikile Kyala

panyēni pa bāna bāke. Umwēne ābīkīle Kyala pankyēni pa kalikōsa akangi. Umwēne aalyegile i Kitangalala kya Kyala, ikyakwanda.

<sup>114</sup> Kyala ikufimbilisigwa ukuya nu buyo ubwakwanda mu ndumbula yako, ubuyo bwakwanda mbumi bwako, buyo ubwakwanda mu kilikyosa iki ugwe kubomba pamo iki ugwe uli. Kyala abagisenie ukuya gwakwanda. Umwēne atikulōnda ubuyo bwa kibili. Umwēne atikufwana ubuyo bwa kibili. Umwēne ikufwāna i kikīndafyosa, kangi i kyākwānda, kangi kyōsa iki uswe tulinakyo. Umwēne ikufwāna ikyēne. Yisayigwege i Ngamu Yāke i nyikemo!

*Kabuno Kyala kangi ikubīkīla . . . ubuketi, umwene apele ubuketi, fyōsa-fibili ni fimanyilo ni fiswigisyo, . . . ifika ifikindanekindane, kangi ifikungilwa fya Mbepo Mwikemo, ukufwana nu bwigane bwake mwene?*

<sup>115</sup> Komma iki abanyāmbāla bikuyoba, iki ikipanga kyāyobīle, lōli iki ubwīgāne bwa Kyala bwāli. O, uswe tukufūmbwa ukulondalonda ubwigane bwa Kyala, komma ubukūndwe bwa mpalamani gwako, komma ubukūndwe bwa bana bako, komma ubukūndwe bwa ndumego pamo nkasigo. Lōli, lōndēsya u bwīgāne bwa Kyala, kangi bōmba kila tāsi. Polelo filifyosa ifingi, u bwīgāne bwa nkasi kangi u bwīgāne bwa bana, bwīsa kugwīla mulamula nkati ni kyēne. Lōli, mbīka Kyala ikyākwānda.

<sup>116</sup> Kētēsya, lilino.

*Kabuno ku bāndūmi umwēne akabīka mu bulāmbike i kīsu iki kikwīsa, ikya kīkyo uswe tukuyoba.*

<sup>117</sup> Mu būngi, a Bāndūmi abakulumba aba bikubōmbēla mu Myānya, Gabrieli, Mikaeli, Mbosya, kangi abakalongo ba maelifu ukubasania na malongo ga maelifu ga Bandumi ba ku Mwanya; pamo abakalongo ba bamia ba basololi aba bāli pa kīsu, aligwesa gwa bēne; Umwēne akābīkāmō siku gwēsā gwa bēne ukuya nu bulagili pamwanya pa kīsu iki kikwīsa, iki uswe tukuyobelapo. Komma na yumo! Umwene akāyobilēmo siku, “Yesaya, ugwe kwisakulagīla ikīsu.” Umwene akābīkilēmo siku ikīsu mu bulāmbike bwa Eliya. Pamo Umwēne ābīkilēmo ikyēne kwa Gabrieli, pamo gwēsā gwa bēne, yiliyōsa i mbepo imbōmbi.

<sup>118</sup> Kētēsya iki umwēne āyobīle, Pauli, akāli ikuntufya Kristi, kūko uswe tukuyobela.

*Lōli yumo mu buyo bumo ābīkīl’ubukēti, ikuyoba, Ngimba u mūndu yo fiki, ukuti ugwe gwe gwākupākīsya ifya umwēne? pamo u mwanundumiana gwa mundu, ukuti ugwe gwābagile ukunjātīla umwēne?*

*Ugwe untēndike umwēne panini gwāpāsīpo pa bāndūmi; ugwe umfwīkil’ingiga umwēne nu lwīmiko kangi nu lugīndīko, kangi nalōli gwālimbīkīle umwēne pamwanya pa mbōmbo sya kiboko kyāko:*

119 Lilino, linga ugwe kulonda ukubala ilyo, ilyene lyo Masalimo 8:4-6, Davidi ikuyoba. Lilino fyofiki umwene alinkolile Davidi apa? Ikyo kikumasya ikyēne, palapala pala, kali une nāli nталусye ulubunju ulu, pa nsololi.

120 Umwēne alinkuti, “Kabuno yumo mwa bandumi alinkuti mbuyo bumo.” Davidi, u ntumigwa gwa Kyala, aali yo gwaandumi gwa Kyala, kabuno umweene aali yo ntumigwa gwa Kyala. U gwandumi alinkuti, Davidi ayobile, mu Masalimo, “Ugwe ubombile gwālimpelile Umwene ukuya pasipo ukukinda a Bāndūmi ba Kumwanya.” U gwāndūmi āyobile ukuti Kyala ālintendike Umwēne pāsipo ukukinda u Gwāndumi, ukuti Umwēne ābagile ukumfwik’ingiga Umwēne; kangi Umwēne ābagile ukukubilwa nu kōnja ifwa, ukuti afyūsigwe mmwanya kangi. Ukuti Umwēne abagile ukumpela Umwēne ukuya... ukwingilapo pa findu fyosa ifya nkisu. [Ubuyo busitakandu pa tepi—Nsimbi]

121 Lilino, mwa—mwa Matai 28:18, uswe tukubala ifi. Ukufuma pāpo Umwēne akomeleligwe nu kusyūka kāngi pisiku lyabutatu, Umwēne ālyāgéne na bafūndigwa Bāke nu kubalagila abēne ukubūka nkisu kyōsa, ukulūmbilila i Nongwainunu ku kipeligwa kilikyōsa. Umwēne alinkuti, “A maka gōsa ku Mwānya na nkisu gapēgigwe mmaboko Gāngu. A maka gōsa ku Mwānya, amaka gōsa nkisu, gapēgigwe kwa Une.” Kyāli fiki ikyēne? Mūndu na Kyala bāli yumoywēne. U Logos ātēndekigwe ukuya mbili kangi āfumile pakugogigwa, kangi āsyūkile kāngi kuli u bwitakisigwe bwūtu, kangi polelo āli mpakigwe Imanueli kuli bwīlanabwīla kangi kuli bwīlanabwīla. Kyala ālyāndwile u buyo Bwāke bwākwītūgāla, ukufuma ku Kikota kimo mu mifwāsi mula, ukubuka ku ndumbula ya Mwanundumiana Gwake, Kristi Yeso, ukuya nu bumi nu bulagili bwīlanabwīla. “Kyala aali mwa Kristi.” Umwene yo buyo bwabutūsyo bwabumalikisyo bwa Mbepo.

122 U Mbepo ālitūgèle mu kitēmbē, ilisiku limo, umwe mumenye ikyo, pāsi pa kisasa. “Kangi Solomoni ālinjengile Umwēne i nyumba. Lōli, palema pa isi, u Gwapamwanya unkinde-bosa atikwitugasya mu nyumba iyi yitendekigwe na maboko.” “Loli u mbili Ugwe umbēlile Une.”

123 Kula mwa Buku gwa Imbombo, untu gwa 7, akabalilo kako umwene aayobaga, umwene aatile, “Bosa ba abene baakētīlēngani Ikyene. Abene bayengile kihema kuli Umwēne, Mōse ābombīle, āli ni kihema, nu kubīka i ngalaba nkati mula, kabuno Kyala āli pa Kikota Kyākisa. Umwene akaalitugesye pala.” Umma ndaga.

124 Polelo, “U mbili ugwe umbelile Une,” u mbili gwa Ntwa Yeso Kristi, gutendekigwe pāsipo ukukinda a Bāndūmi ukōnja ubufwe; kangi nayumo lōli yu gwapamwanya fiyo, Kristi; u

Nsōka gwa Lutengano, u Mwalafyale gwa banyafyale, u Ntwa gwa ntwa, u Mpeli gwa ndondwa yiliyosa mmwanya.

<sup>125</sup> O Kyalā! Umwene alinkuya pāsipo ukukīnda ikipeligwa Kyāke, ukuti Umwene abagīle ukutabula u mundu (nsitakāya, mūndu nsitabutūli), nu kūpa abēne akāya m’Mwanya. Umwēne agalekile amalwīmiko ga Mwanya. Umwēne ālekile i Ngamu yapamwanya-ukukīnda iyi yābagile ukukōleligwa. Kangi akabalilo kako Umwēne āli pa kīsu, u mūndu alimpele Umwene i ngamu ya pasi fiyo iyi abene babagile ukumpa Umwene, balinkuti, “Umwene āli mwāna nsigwana, ukwanda itolo.” Āpāpigwe mu bulilang’ombe, āniēmbigwe mu fyēnda ukufuma panyuma ya liyōko lya ngāmbāko. Nabumo ubuyo ubwa kubūkako, akāli na kāya kakubūkako. Kangi ābilikigwe, “Belezebabu,” u mwalafyāle gwa bōhēsi. Umwēne ābinikigwe. Umwēne āfunyiligwe. Umwēne alyūgililigwe. Umwēne āpīkigwe, kangi ābūkile ku fibwīna ifyāpāsi-fīyo, kangi alinkwīnāma ku “bagāsi-ukukīnda ba balogwe.” Ikyo kyo iki u mūndu ābōmbile ku Mwēne.

<sup>126</sup> Lōli Kyalā ālimfyūsīsye Umwēne pamwanya fīyo mpaka Umwēne ikufimbilisigwa ukukēta pāsi ukukēta Kumwanya. Umundu ampele Umwēne ikikota ikypasi fiyo, ukumpapo Umwene ubuyo ubunyali ukukinda, ingamu yapasi. Kyalā alimfyūsīsye Umwēne mmwanya nu kumpa Umwēne i Kikota kyapamwanya-ukukīnda, kangi i Ngamu yapamwanya-ukukīnda. Uko ko kukindana iki umūndu aabombile nu Mwanundumiana gwa Kyalā, kangi iki Kyalā aabombile nu Mwanundumiana gwa Kyalā.

<sup>127</sup> Umwene alinkwinama pasi, ukuti uswe tubagile ukufyusigwa. Umwēne alinkuya uswe, ukuti uswe ukwisila mu lipyana Lyake tubagile ukuya Umwēne. Umwēne ikwīsa ku nsitakaya, kangi alinkuya nsitakaya Mwēne, ukuti uswe tubagile ukuya na kāya. Umwēne ālisīle ku babine kangi āpeligwe ukuya mbine Mwēne, ukuti uswe tubagīle ukubumbulusigwa. Umwēne ālisīle ku ntulwanongwa, “kangi ātēndīke ukuya butulwanongwa, Mwēne,” ukuti uswe tubagīle ukupokigwa.

<sup>128</sup> Fyōbēne Umwene āfyūsīgwe. Yo nongwa Umwene yo Yūyo Umwēne ali ikilo iki. Kyalā ālimfyūsīsye Umwēne, kangi gōsa a maka m’Mwanya na pāsi gapēgigwe ku Mwēne.

<sup>129</sup> Akabalilo kāko imbombo Yāke iya kīsu yāmalike, apa pa kīsu... Umwēne ālisīle ku kīsu, nakalinga itolo bo Umwēne ābōmbīle, i ndōndwa yakulubunju yilinkumfumusya Umwēne ukuya Mwanundumiana gwa Kyalā. Umwēne āyugēnie u mōhēsi aligwēsa uyu Umwēne ālisilēmo kifuki nagwe. Yisayigwege i Ngamu ya Ntwa! Abōhēsi batetemāga nukusenyendeka, nukusūmila i kisa, mu Kuyapo Kwāke. Ena, nkulumba. Gehena gwea āmenye Yūyo Umwene āli.



130 Endaga gwakwiyufya, Umwene akāli nu buyo ukulambalika untu Gwake, pa kilo pa fula. Filafila ifinyamana ifi Umwēne āpelile, “I njuni sya mmwanya sili ni fifūmbwa, kangī abakāmbwe bali ni mbako, loli u Mwanundumiana gwa mundu akaya nu buyo ukulambalika untu Gwake unsayigwa.” Naloli, Umwene aali.

131 Umwēne alinkuya butulwanongwa, alinkuya gwapāsi kangī ntāgigwe. Lōli a bōhēsi bāmēnye Yūyo Umwēne āli. Abēne bālāmbāga kuli kisa. Abēne balinkuti, “Nongwa ya fiki Ugwe kwīsa ukutukubīliŷa uswe bo akabalilo kītu kakīsa?” Kangī akabalilo kako abalumbilili bankolelaga Umwene, “Belezebabu, undagusi yula,” abōhēsi bakōlelaga Umwene, “U Mwanundumiana gwa Kyala gwabumi,” nukusuma ikisa.

132 O, mumo uswe twābagile pēne ukwīma itolo i miniti! Gwe ywāni ugwe, mulimōsa? Ngimba imbōmbo yila ugwe ulinayo yo yikusanusya fiki? Pamo kyo fiki akanyūmba akanini uswe tulinako kakusanusya? Fyo fiki iligali lila uswe tulinalyo likusanusya?

133 Ndindwāna nnini mmogi, ugwe kāndu kamatīngo akanini, ngimba fyo fiki kukubomba ukuboneka ukunini kula kuko ugwe ulinako lilino? Ugwe nyāmbāla ntubwa ni mmulike, inywīli indenefu, ifibega ifīmikigwe, ugwe kwīsakwīnāma ilisiku limo, akabalilo kāko gwīnamisigwe nu bukusi.

134 Lōli, asayigwege u Ntwa! Ugwe uli nu moyo ugu gupāpīgwe kangī. Ugwe kuyaga mumi bwila kangī bwila, panongwa yakuti Umwēne alinkuya ugwe, ukuti ugwe ukwisila mu lipyana Lyake ubagile ukuya Umwēne, nu kutendeka ubuyo kuli ugwe.

135 O, uswe twe tukwīnogōna ukuti uswe tulinalo ulwāndulo lwa fyākufwāla, kangī ifyakulilūka ifinini mu nyūmba, ngimba uswe twe fiki? Kyala abagile ukwēga ikyēne mu sekondi. Umūyi gwāko gulagula gukoleligwe nkiboko Kyāke. Kangī Umwēne pakati pitu ukubumbulusya ababine, ukufumusya nu kuyoba, kangī u kuyobela-ngāni, kangī akabalilo kalikosa kipelelesye. Kangī nukuya gwakupākīŷa ukufwāna ukupyānikīŷa akanini, akaswi akafwāna ukugomokela ku būmi bwāke kāngi, mu nkati mwa uswe. Yehova ukusyungutila uswe, Yehova mwa uswe, u nkulumba kangī gwamaka UNE YONE.

136 Akabalilo kako Umwēne āfwile, abēne binogonaga ukuti abēne bāli nu Mwēne. Umwēne alinkusuluka ku gehena. Akabalilo kāko Umwēne ālekīle ikīsu ilisiku lila akabalilo kāko Umwēne akomeleligwe, Umwēne ābūkile mu mabuyo ga batāgigwe. Ili Bāngēli lyātile, “Umwēne ābukile nukulumbilila ku myoyo igi gyāli mminyololo, igi gikāpīndwike mma mbukubilwe-butali, amasiku ga Noa.” Akabalilo kāko Umwēne āfwile kangī Mbepo Gwāke ālindekīle Umwēne, Umwēne alinkuya Logos kangī. Umwēne, une nguketa, alinkuti, “Une mfumile kwa Kyala. Une ngugomokela kwa Kyala.”

137 Kangi Kyalā āli Mbanda ya Moto yila iyi yalōngolīle a bāna ndulangalanga. Kangi akabalilo kako Umwēne aali pa kisu kya pasi...Kangi akabalilo kako Umwēne afwege, Umwēne alinkusanukila ku Bwelu kangi. Pauli alimbwēne Umwēne, kangi Umwēne ali Lumuli. Nayumo ugwa bosa abene balimbwene Umwēne. Abene balimbwēne Pauli ikugwa. Ikindukimo kilinkuntika umwēne, kangi Ikyēne kyāli Bwelu. Pauli āyobīle, “Yo ani Umwēne uyu une ngufwīma?”

138 Umwēne alinkuti, “Sauli, Sauli, nongwa ya fiki ugwe kufwīma Une?”

Alinkuti, “Yo ani Ikyēne?”

139 Umwene alinkuti, “Une ne Yeso, uyu ugwe kufwīma, kangi ikyēne kikafu kuli ugwe ukubāya ukulwana ni mīfwa.”

140 Polelo umwēne ābūkīle nukwakufūnda u Bwēlu bula. Pauli āgomokīle mu i Bāngēli, ukusyāgānia iki u Bwēlu bula bwāli. Kangi umwene āsīmīle u Kalata uyu. Umwene yo Yehova yulayula. Lula u Lumuli lulalula lwa mmatengele na bana ba Israeli. Kangi akabalilo kāko Peteri āli mminyololo, Umwēne āli Bwēlu ubu bwālingīle nkati nukwīgula ififigo.

141 Kangi ukwisila mu lipyana Lyake, popapo nayumo isakuyaga nu bulēyo bulibosa...O, linga abene babagile ukwibwa abatumigwa abasitakumanyila, kangi kumbukilaga: ikyēne kikaya ntumigwa, ikyēne kyo Ndumi. Umwene isile pāsi kangi, na uswe, mbubumbe bwa Mbanda ya Bwelu. Kangi Umwene ikwendeketa ni fika Fyake filafila, nakimo pānja pa i Bāngēli; ukusyāla mulamula ni Bāngēli, ukukikolelēla ikyēne pāsi pa bulāmbīke, ukutwala panja ulwimiko Lwāke, ukunangisya a maka Gake. Yisayigwege i Ngamu Yake inyikemo!

142 Une mmenye ugwe kufimbilisigwa ukwinogona ukuti une ne nsyūtano; loli, o, bula ubusayigwa Butūsyo Bwasyepwa ubu buli mu moyo gwangu, palema nalinga imibelo gibagile ukuyiga, i ngimu yāngu yikukolelēla nkati nkikīngo.

143 Kangi ukumbona Umwēne akabalilo kāko Umwēne āfwīle, mpaka, umwēsi guli nu bukupame bwa lutende. Iisuba lilinkwīngīla pakati pa mūsi. Kangi akabalilo kako Umwene abukege ku mabuyo ga batagigwe, [Nkundwe Branham ikukung’usya pa kigemo—Nsimbi.] alinkukung’usya pa kifigo, kangi i kifigo kilinkusyūta ukwīgūka. Ili Bangeli lyātīle, “Umwene ālumbilile ku myoyo igi gyāli mminyololo, igi gikapīndwike mma mbukubilwe-butali mmasiku ga Noa,” bo Umwēne āfwīle pa kīsu iki. Nkundwe gwāngu, kalumbu gwāngu, akabalilo kāko Umwēne āsimīle, imbōmbo Yāke yapakīsu yābōmbigwe, lōli Umwēne ākāli ābōmbāga. Kangi Umwene akaali ali pa mbombo ikilo iki. Amenī.

144 Umwēne ākūng’usyaga ku fifigo fya bayōnge. Ili Bāngēli lyāyobīle Umwēne ābōmbīle. Kangi Umwēne ābīkil’ubukēti,

“Une ne Luyungu lwa nkikúlu. Une ne Umwène uyu Adam ayobelaga ngapo. Une ne Yumo uyu Enoki ayobile ábagile ukwisa na maelifu kalongo ga bikémo Bâke. Une ne Mwanundumiana gwa Kyala gwabumi, kangî umwe mwâtulilw'inongwa ukufuma ku lisiku linu lya ipyâna. Lôli ikyène kyâsololigwe kwa ugwe, na bandumi, Enoki, Noa, ukuti une ngufimbilisigwa ukwisa ukufwanikisya i Lisyu lililyosa ilya i Bângeli lya Kyala. Une ndi apa ukuya nketi mu iki 'kîsu kya bayõnge.” Kangî Umwène âlumbilile ku bene.

Ukukîndilila pâsi mu gehena Umwène alinkubûka, kulakula ukusuluka ku fifigo fya gehena, alinkukung'usya pa kifigo. U môhési âligwile ikifigo, alinkuti, “Une ngwâgile Ugwe lilino.”

<sup>145</sup> Alinkuyugânia i fûngulilo sila ukufuma ku lubafu lwâke, alinkuti, “Ugwe môhési, ugwe ukolelelile ubusyõbi ku kabalilo katali.” Apa ikyene kili, papapa apa mwi Bangeli. Une ngwisa ku kyene nu miniti yimo. “Ugwe ukolelelile ubusyõbi akabalilo katali, lôli Une ngwisa ukupoka.” Alinkukamata ifûngulilo sila nu kumbâya umwène ukugomokela nkati, nu kwîgâla i kifigo.

Ukwisa ukukinda nukupimba Abrahamu, Isaki, na Yâkòbo. Pa lisiku lya butatu Umwène âfyûkile, kangî bala bâbo bâgonil'utolo mu lipûmba bafyûkile nu Mwène. O, aleluya! Yo nongwa umwâti ayobile:

Ukuyamumi, Umwene alinganile une; ukufwa,  
Umwene âlimbokile une;  
Ukusyiligwa, Umwene aapimbile imbibi  
syangu kubutali;  
Ukusyuka, Umwène âlinsalile mwaitolo  
kwâbwîla:  
Ilisiku limo Umwene ikwisa—o, ilisiku ilinoge.

<sup>146</sup> Fisayigwege i fipinyo ifi fikupinya ndumbula syitu nu bulilanisi bwa Kikristi, u lugano lwa Kyala. Akabalilo kako Umwene âsyukile, Umwene akamalisigwe mma, tâsi. Umwene âli ni mbombo yimo iyakubómba.

<sup>147</sup> Ili Bângeli lyâyobile, “Umwène âfyûkile pa Mwânya nu kupa ifikûngilwa ku bându.” Bwâlipo ubusyûngutiligwe bwîtulike pamwanya pa kîsu, ubwa ngîsi, ubwa busulumanie, ubwa bufwe, kangî ubukatale. I nyîpûto sikâbagile ukwisa pamwanya, panongwa yakuti u Buhõmbe bukâtêndekigwe mma. Loli, Umwène alinkuswanyulania ikikîngo kila. Umwène alinkwigula môsa injila yila. Umwène alinkuswanyulania ikikîngo kya bubine. Umwene alinkuswanyulania ikikîngo kya butulwanongwa. Umwène alinkuswanyulania ikikîngo kya bukatale. Umwène alinkuswanyulania ikikîngo kya busulumanio. Umwène âbongotwile ikikîngo kilikyõsa, kangî âtêndike unsebwé-unywâmu kuli u mûndu gwamunjila, ukwênda pamwanya pa nsebwé-unywâmu gwa Mwalafyâle. O,

mwe, akabalilo kako Umwēne ākindile u mwesi ni ndondwa, nkyeni kang'i nkyeni!

<sup>148</sup> Ikukōngēsya, kunyuma ku Mwēne, bakwisa abikēmo ba Lwītikāno Ulukūlu, Abraham, Isaki, na Yākobo. Abēne bāli palapala nkyēni mmwānya mu myānya ya Kumwanya. Akabalilo kako abēne bāli kubutali fiyo na Kaya, une mbagile ukubabona abēne bikufyusya amaso gabo. Abrahamu alinkuti, “Kala ko Kaya aka une nālisyūkile ukuketa. O, isaga kuno, Isaki. Isaga kuno, Yākòbo. O, uswe twali bendanjila kang'i bahesya aba kīsu, loli pala kalipo a Kaya kala. Paa alipo Yūyo uswe tugūlilēpo.”

<sup>149</sup> Kang'i i Bāngēli lyāyobīle abēne balinkuywega, “Inula mmwānya, umwe fipata ifyabwilanabwila, kang'i yaga umwe bīnuligwe mmwānya, kabuno u Mwalafyāle gwa Lwīmiko ikwīsa nkati.”

<sup>150</sup> Kang'i a Bāndūmi kunyuma ku fipata balinkuywēga ukugomola ku bāndūmi aba kunyuma kuno, kang'i alinkuti, “Yo ywāni u Mwalafyāle gwa Lwīmiko?”

<sup>151</sup> Kang'i a bāndūmi panja apa, abasololi, balinkuti, “U Ntwa gwa Filundilo, Mwenemaka mu bwite.”

<sup>152</sup> Kang'i abēne balinkubīnda a mabatani kang'i i kifigo ikinywāmu kilinkusyūta ukwīguka. Palapala ukusuluka ukukinda pakati pa ngindi Umwēne ikwīsa, u Mpōnjōli, bupōnjōli, na bīkēmo ba Lwītikāno Ulukūlu bikwēnda kunyuma ku Mwēne. Ukwitugasya pāsi pa Kikota, alinkuti, “Tāta, apa abēne bali. Abēne bo Bāko.”

<sup>153</sup> Umwēne alinkuti, “Fyuka pamwanya apa kang'i itūgāsya pāsi, mpaka Une ngutēndēka bōsa abalugu Bāko ukuya kyakunyilapo Kyāko.” Bo uswe tukukindilila ukubala, uswe tukwaga ukuti pa apa mu Lisimbo. Umma ndaga.

<sup>154</sup> Pilikisya. Lilino pakuti uswe tuli pa linandi lya 8:

*Polelo umwēne ābikīle ifindu fyōsa mu bwīlambike pāsi pa malundi gake. Kabuno...umwene ābikīle i findu fyosa mu bwīlambike pāsi pa malundi gāke, umwēne akālekīle nakimo iki kikaya...pāsi pa mwēne. Lōli lilino uswe tukukēta komma...ifindu fyōsa fibīkīgwe pa mwēne.*

Ubo bo, bufwe. Uswe tutikububona ubufwe, tāsi, panongwa yakuti uswe tukāli tukufwa. Uswe tukukēta ubufwe.

Lōli, ilinandi lya 9, “Lōli uswe tukumbona Yeso!” Amen. Pilikisya.

*...uswe tukukēta Yeso, uyu ātēndikīgwe panini pāsīpo ukukīnda abāndūmi kuli ubukūbīlwe bwa bufwe, afwīkīgwe'ingiga nu lwīmiko nu lugīndiko; ukuti umwēne ukwīsila mu lipyāna lya Kyala abagile ukōnja ubufwe kuli u mūndu aligwēsa.*

Nongwa ya fiki Umwēne ātēndekígwe pāsipo ukukīnda a Bāndúmi? Ukuti Umwēne ābagīle ukōnja ubufwe. Umwēne alinkufīmbilisígwa ukufwa. Umwēne alinkufīmbilisígwa ukwisa, ukufwa.

155 Keta kuno, mwinangu. Komma, siku ukwībwāmo iki. Akabalilo kāko Yeso ābūkāga, ikwēnda pamwanya pa kāmba, ubufwe bwabunabunaga ukusyungutila untu Gwāke.

156 Unko uswe twēge ikipīcha kyītu ku Yerusalemu, ifyīnja maelifu mabili ifi fikīndilēpo. Kangi ngimba ugwe ubagīle bulebule ukukāna Ilyēne? Une ngupilika akogo ka kwisa mu lukindi. Ngimba ikyene kyo fiki? Ikyene kyo kulūnduka kwa kindukimo. Ikyēne kyo kipīngīka ikyaiyolo ikyamagēngelēmia kikusuluka pāsi, kikubūka pānja pa fipata fya Damsko, kikulūndūka ukukīsānia pamwanya pa mabwe ga palubīngilo. A mabwe gala amanywāmu ga palubīngilo gakāli galiko kula. Kikulūnduka pamwanya pa aga ilibwe lyapalubīngilo ilinywāmu, lunduka-lundu. Une ngukēta ukusulula kwa Lilopa pa lukīndi. Ngimba ikyēne kyo fiki? Ikyēne yo Nnyāmbāla uyu akabōmba nu bubībi nabumo; nakimo lōli ikinunu. Abāndu bāli bafwamaso. Abēne bakālimēnye Umwēne. Abēne bakālimmwāgénie Umwēne.

Ugwe kuyoba, “Mfwamaso? Ngimba abene bābagīle ukuya nu bukētēlo bwābo?”

157 Ugwe ubagīle pōpe ukuya nu bukētēlo bwāko nu kuya mfwamaso. Umwe mukwītika ikyo? I Bāngēli lyāyobile lūlo. Kumbukilaga Elisha pāsi ku Dothan? Umwene āsōkaga panja nukutika abandu nubufwamaso, alinkuti, “Lilino ngōngesyāga une.” Abene bāli bafwamaso ku mwene.

158 Kangi abandu bafwamaso ikilo iki. Ikipanga kimo iki kitikwitika mu bubumbulusyo Bwakyala, kilinkufyuka kwa une akabalilo kamo, nukuti, “Ndika une nubufwamaso. Ndika une nubufwamaso.” Ukwēne kwāli ku nyūmba ya Nkundwe Wright. Alinkuti, “Ndika une nubufwamaso.” Alinkuti, “Pauli ātikīle unnyāmbāla mfwamaso, akabalilo kamo.” Alinkuti, “Ndika une nubufwamaso.”

159 Une ndinkuti, “Mwinangu, u mōhēsi atalile abōmbīle ikyene. Ugwe utalīle uli mfwamaso. Naloli, ugwe uli.”

160 Umwene alinkuti, “Bumbulusyāga undindwana unnini uyu kangi une ngwisakukwitika ugwe.”

161 Une ndinkuti, “Pokaga untulwanongwa yula kangi une ngwitika ugwe.” Naloliloli.

162 “O,” umwene alinkuti, “umwene ikufīmbilisígwa ukwitika.”

163 Une ndinkuti, “Ikindu kilakila apa, ikyene kikufimbilisigwa ukwisila mu lipyana lyapasima lya Kyala.”

164 U mohesi, u—u kyala gwa kisu iki, agogile amaso ga bandu. “Abene bali ni fisige loli abene bakabagila ukuketa,” ili Bangeli liyobile.

165 Apa Umwēne āli, ikubūka pamwanya pa lukīndi, ikukwāba mōsa amakato Galilopa pa nsebwe pamwanya. I *njuki* ya bufwe yātitāga ukusyūngutīla Umwēne, yikubuna ku Mwēne, “Itolo akabalilo akanini kangī une nisa kuya na Ugwe.” Umwēne āyaga mōnywa, imīlwe amīsi.

166 Une nātusuligwe akabalilo kamo, nālambalele apa mu ngunda, ililopa itolo likoneka ukufuma kwa une. Une ndinkukūtīla kuli misi. Kangī umwīnāngu ābopīle, alinkwēga i kitili nu kukibīka ikyēne pāsi mu mīsi; gaiyolo amalūlāle, ingegele m’mīsi. Alinkwīsa ukugomoka, kangī une ndikukolelela a kanwa kāngu kīgwīke; umwēne alinkukama kila. Panongwa yakuti, i lilopa lyāpininikaga ngati nyībūko, pāpo une nātusulilīgwe ku tupato ni ndusu. Nūmilwe!

167 Polelo une mmenye iki u Ntwa gwāngu abagīle ukuya, ukufuma pa kōn’lilopa lōsa ulubunju lula, ukufuma pa sala ya lwele-na-yimo ukufyuka ku sala ya butatu namayolo, ukutāga i Lilopa lyōsa lila. Une ngukēta unselekesye Gwāke, ikyāk wānda, ngati ututōnyela utunini fiyo pa gwēne. Kangī tōsa tula ututōnyela tukwānda ukuya tunywāmūpo nu kubūka palikimo, ukutēndēka kimokyēne ikinywāmu ikitōndōbya Kyalilopa, gukutika Umwēne pa kilundi bo Umwēne ālyēndīle ukusyūngutīla. Lila lyāli Lilopa lya Immanueli. O, ikīsu kikāli kyākufikāpo pa Kyēne.

168 Loli bo Umwēne ikufyuka mmwanya, iyī *injuki* yikutita ukusyūngutīla Umwēne. Ngimba iyene yabombile fiki? Iyene kubumalikisyo yilinkuntita Umwēne.

Lōli, nkundwe, aligwēsa amēnye, ukuti akanyamana pamo i njuki, linga iyēne yikutitamō siku kamokēne, ikyo kikumalisya imbombo ya kutita. Iyēne yikabagila ukutita kāngi mma. Panongwa yakuti, akabalilo kāko iyēne yikusōkāpo, iyēne yikukusopolēla pānja akasufi kāke.

Fyōbēne Kyala afimbilisigwaga ukuya mbili. Umwene alinkwega isufi ya bufwe mu mbili Gwake, kangī Umwēne alinkukwaba isufi ukufuma ku bufwe. Yisayigwege i Ngamu ya Ntwa! Bufwe bubāgīle ukubuna nu kutita, lōli ubwēne bukabagila ukufulasya ugwe.

169 Pauli, akabalilo kāko ālipilike *injuki* yila yikubuna ukusyūngutīla umwēne, bufwe bwīsāga palapala nkyēni. Umwene alinkuti, “O bufwe, kali kugu ukasufi kako?” Umwene abagile ukusosola ku Kalvari kuko ikyene kyalekigwe mu mbili gwa Imanueli. “Buli kūgu u bupōnjōli bwāko? Lōli ngupālisya kwa Kyala yūyo ikupa uswe ubupōnjōli ukwisila mwa Ntwa gwītu Yeso Kristi.” Ena.

170 Uswe tutikuketa ifindu fyosa.

*Lōli uswe nalōli tukumbona Yeso, uyu ātēndekigwe pāsipo paninipo ukukinda a bāndūmi kuli... ukukubilwa kwa bufwe,...*

*Namanga ikyēne kikuya umwēne, kuli yūyo fyō fyōsa — fyōsa ifindu, ukuti ukwīsila m’mwēne uswe tulinafyō fyōsa ifindu, mu u kwānda... abānabalumiāna bingi... kangi ātēndekigwe u kapitao nkulumba gwa bupoki bwitu... ukwīsila mu kukubilwa.*

Injila yene iyi Umwēne aabagile ukuya Kapitao gwa bupoki bwitu, Umwēne alinkufimbilisigwa ukukubilwa.

171 Pilikisya ku Masyu amamogi aga apa lilino. Lilino pilikisya.

*Namanga fyosa-fibili umwēne uyu ikukemesya kangi abēne aba bikukemesigwa bo bōsa... kimokyēne:...*

O, ngimba umwe mutikugubona u Mpesa nu lusāmba pala? Fyōsa kimo.

*...panongwa ya iki umwēne akaya ni soni ukubilikigwa bakundwe,*

Muketile? Nongwa ya fiki? Pilikisya, ilinandi ilikōnge.

*Ikuyoba, une nisakufumusya ingamu yāko ku bakundwe bāngu, nkati mwa kipanga nisa une kwimba indufyo kwa ugwe.*

*Kangi ukōngelelāpo, une nisakubika ulusūbilo lwāngu mwa umwēne. Kangi ukōngelelāpo, Kēta une na bāna aba ugwe ubōmbile umbele une.*

*Namanga polelo bomūmo abāna bo balilansi ba mbili ni lilopa, umwēne yōpe mwēne mulamula alinkuya kiyabo kya kilakila; ukuti ukwīsila mu u bufwe umwēne abagile ukōnānga umwēne uyu ali na maka ga bufwe, uyo yo, mōhési;*

*Kangi ukubānga bala bābo ukwīsila mu... kuli u... ukwīsila mu... kuli bufwe bwāli bwila bwakyūngigwe bwakwīlāmbika ku bupinyigwe.*

172 Mūndu akabalilo kōsa ātilāga ubufwe. Kristi alinkuya butulwanongwa, ukutēndekigwa gwapāsi, ukwēga ubufwe pa Mwēne. Kangi Umwēne akaya ni soni ukubililigwa gwitu “Nkundwe,” kabuno Umwēne āgeligwe itolo mūmo uswe tukugeligwa. Kangi Umwēne abagile ukupela i... ukuya luko ulutalusye ulwa mwimila-pakati, panongwa yakuti Umwēne ālimile u luko lulalula ulwa lupēsyo ulu ugwe kwīma. Kangi Umwēne ālyegile u buyo bwako, amenye ukuti ugwe ukābagile ukwega ubwene gwimwene.

173 Polelo, ngimba umwe mutikukēta, nkundwe, kalumbu? Ikindu kyōsa kyo lipyāna. Kyōsa kya ikyēne kyo lipyāna. Ikyene kikaya iki ugwe kubomba, mulimosa. Ikyene kyo iki Umwēne atalile abōmbile kuli ugwe. Lilino, ugwe ukabagila ukubōmba

ikindu kimokyeñe ukubagilila ubupokigwe bwāko. Ubupoki bwako kyo kyabupi. Kristi alinkuya butulwanongwa, ukuti ugwe ubagile ukuya ngolofu. Kangi Umwēne yo luko ulutalusye ulwa Kapitao Nkulumba panongwa ya bupoki bwitu, panongwa yakuti Umwēne ākubilwe itolo bo uswe twākubilwe. Umwēne āgeligwe itolo mūmo uswe tugelile. Kangi Umwēne akaya ni soni ukukoleligwa “Nkundwe gwitu,” panongwa yakuti Umwēne amenye ifi uswe tukukindamo. O, yisayigwege Ingamu Yake!

*Kabuno naloliloli umwene alinkusita kwēga pa mwēne u luko lwa bāndūmi; loli umwēne alinkwega pa mwene u luyungu lwa Abraham.*

<sup>174</sup> O, mwe! Umwene akālisile ukuya Gwāndumi. Umwēne alinkuya Luyungu lwa Abraham. “Kangi uswe, ukuya bafwe mwa Kristi, tukwega pa Luyungu lwa Abraham, kangi tuli bingilakilingo ukufwana nu lufingo.” Muketile? Umwene akālyegilemo siku uluko lwa Gwāndumi. Umwene akālīmo siku u Gwāndumi. Umwēne alinkuya Nnyambala. Umwene alinkuya Luyungu lwa Abrahamu, kangi alinkwega ulutito lwa bufwe mu mbili Gwake Mwene, ukusayanisya uswe ukugomokela kwa Kyala, kangi lilino itūgēsye pala kuli u Mpepekēlo. Mwe, tubagile bulebule uswe ukupika Ilyēne, mwīnāngu?

<sup>175</sup> Pilikisya.

*Fyōbēne mu fyōsa ifīndu ikyēne kikufimbilisīya umwe ukutēndekīgwa ngati bakūndwe bāke, ukuti umwene abagile ukuya gwakisa kangi nsūbilīgwa mputi nkulumba mu findu ifyakufwana na Kyala, ukutēndēka ulusayanisano . . . u butulwanongwa bwa bāndu.*

<sup>176</sup> Ukuti Umwēne abagile ukuya Nsayanansi! Muketile, bwālipo ubulugu pakati pa Kyala nu mūndu. Kangi nayumo umūndu . . .

Abēne bātumile a bāndūmi, abasololi. Abene balinkutoligwa ukwega ubuyo bwako, kabuno abene bafimbilisigwaga ukwiputula kuli isyabēne. Abene balinkutoligwa ukwega ubuyo.

<sup>177</sup> Polelo, Umwene ātumile u lulagilo. U lulagilo lwāli u gwāsikali ulu lwātubikile uswe mminyololo. Ulwēne lwātoligwe ukututwāla uswe pānja. Umwēne ātumile u lulagilo.

Umwēne ātumile abasololi, Umwēne ātumile abagolofu, na filifyōsa, bakābagile ukutēndēka u buhōmbi. Loli Umwēne ikusuluka pāsi nu kuya yumo mwa uswe. O, mwe!

<sup>178</sup> Une ngunyonywa uswe twāli na kabalilo kingipo lululu lilino, une ngulōnda ukwēga umwe ku lulāgilo lula ulwa butabulo; lōli uswe tukaya, lōli itolo ku kabalilo. Ikibonekelo ikimogi kyo kili mwa Naomi na Naomi. Linga ugwe kwisakukēta pala, u lusayisano, mūmo fikuti u nnyāmbala-ndume, u mūndu uyu ābagile ukutabula u njōnge na kayīlo ka bugwāno,



āfimbilisigwāga ukuya mundu-nkamu ku mūndu yula uyu ātāgile akayilo. Iyo yo nongwa Boazi aafimbilisigwaga ukuya . . . aali nnyambala-nkamu kwa Naomi, ukuti umwēne abagiile ukummwēga Ruti. Kangi polelo, umwene afimbilisigwaga ukuya gwakubagilila. Umwēne āfimbilisigwāga ukubagila ukubōmba ikyēne, ukutabula u njōnge. Kangi Boazi, pa kipata, āpēle ubukēti bwapabwēlu, ukwīsila mu kubāya i kilato kyāke, ukuti umwēne ātabwile Naomi na fyōsa fya fyāke umwēne. Kangi umwēne āfimbilisigwāga ukuya mūndu-nkamu.

<sup>179</sup> Kangi iyo yo nongwa iyi Kristi, Kyala, afimbilisigwaga ukuya mundu-nkamu kwa uswe. Kangi Umwēne alinkwisa pāsī kangi āli Mūndu. Kangi Umwēne alinkukūbīlwa ulupēfyo. Kangi Umwēne āsekīgwe, ālyūgililigwe, nu kufwīmīgwa, nu kusūligwa, nu kubilikīgwa “Belezebabu,” kangi—kangi ukūgililigwa, nu kukubilwa ubufwe pāsī pa lufūndo ulukulumba. Muketile? Umwēne āfimbilisigwāga ukuya mundu-nkamu na uswe. Umwēne āfimbilisigwāga ukulēyeligwa mbusyōbi, panongwa yakuti ugwe kulēyeligwa mbusyōbi. Umwēne āfimbilisigwāga ukupīmba ububine, panongwa yakuti ugwe uli mbine. Umwēne ifimbilisigwāga ukupīmba imbibi, panongwa yakuti ikyēne kyāli mbibi syāko. Kangi Umwene alinkufimbilisigwa ukuya nkamu-mūndu. Injila yene iyi Umwēne ābagile ukututabula uswe kwāli kuya nkamu-mūndu kwa uswe. Kangi mūmo Umwēne isaga ukuya nkamu-mūndu, ko kwīsila mu kwēgapo u luko lwa nyōfu ugwabutulwanongwa nu kuya yumo mwa uswe. Kangi mu ikyo, Umwēne āhōmbile untengo nu kututabula uswe ukugomokela mu bulilani bwa Tāta. O, yo Mpoki nki! Amasyu gakābagile ukukiyoba ikyēne.

*Kabuno mu ikyo umwēne mwēne akubīlwe ukuya gwakwilāmbika, . . . kangi abagile ukutūla bala bābo bapēfyigwe.*

<sup>180</sup> *Kutūla* kokuti u “kupelel’ikisa.” Ikyo, i nōngwa Umwēne alinkuya *iki*, ukuti Umwēne abagile ukuya mpelel’kisa na ugwe yūyo ali . . . alinafyo *ifyakufyūka* ni *fyākusuluka*, kangi utwāko utunini *utwākūngila* kangi *utwākūsōka*, kangi imbēsyo syāko sikufika ukuya ngulumba fīyo ugwe ukabagila kifuki ukwikasya ikyēne. Umwēne amēnye akapelel’ikisa na ugwe. Umwēne ikwitūgāsya pala, ikwīmīlila pakati. Umwēne ikwitūgāsya pala, ukukugana ugwe. Kangi palema nalinga ugwe kuyōnga, Umwene atisakukutāga ugwe. Umwene akāli isakwisa ukukōnga ugwe nu kukung’usya ku ndumbula yāko. Akayapo nayumo ungomokelanyuma mu kiyūmba iki lōli uyu amenye ukuti Kyala ikukung’usya ku ndūmbūla yāke bwila. Kangi Umwēne ikubombaga ikyēne akabalilo kosa ugwe uli gwakufwa pa kisu iki, kabuno Umwēne ākuganile ugwe. Umwēne ākutabwile ugwe.

<sup>181</sup> Abāti bagelile, abasīmbi bikugela, umūndu ikugela ukulīngānia ifūndo yila ya “lugano,” kangi ikyēne kikabagile

ukwāgigwa mu buyobelo bwa būndu. Yumo āyobīle:

O, lugano lwa Kyala, lukabi bule kangi  
lupelelesye!  
Lusitakugeligwa bule kangi lukafu!  
Ulwēne lwīsa bwilanabwila ukūmilisya,  
Bikemo na Bandumi u lwīmbo.

Linga use ni lāngi inyānja tukwīsūsya,  
Kangi imyānya ni kalatasi gyātēndekigwe;  
Iliyoya lililyōsa pa kisu lyāli kyakusimbila,  
Kangi unyāmbāla aligwēsa u nsīmbi pa  
mbōmbo;  
Ukusimba u lugano lwa Kyala Pamwanya  
Āngāli kikunwa inyānja ku būmu;  
Pamo i kiniēmbē kyābagīle ukwīngisyamo  
fyōsa,  
Palema nalinga kyābāluligwe ukufuma ku  
mwānya ukubūka ku mwānya.

<sup>182</sup> Umwe mutisakukupilikisya siku. Yikayapo injila kuli uswe ukupilikisya ukuti ubwīyipe ubukulumba bula, ubu Umwene ābombīle, bulinkusuluka pāsī nukutusayanīsya uswe ukugomokela kwa Kyala. Polelo Umwene āgomokīle kangi alinkuti, “Lilino, une ndisakubaleka umwe kisitabusūbīsyo. Une ngwisaga kangī nukuya na umwe, mope nkati mwa umwe, mpaka bumalikisyo bwa kisu.”

<sup>183</sup> Kangi apa uswe tulipo umwisyugu, ukuya nu būmi nkabalilo ka bumalikisyo, na yu Yeso yulayula, ifindu filafila, ifimanyilo filafila, ifiswigo filafila, ubupoki bulabula, u Mbepo yulayula ikubomba ifindu filafila, i Nongwainunu yilayila, i Lisyu lilalila, ifyakubonesya filafila, ifyakubonekela filafila, filifyōsa. Ikyēne kikufimbilisya uswe komma ukusūla ubupoki ubukulumba ubu, kabuno uswe tukufimbilisigwāga ukupa ikumeleligwa, ilisiku limo, na ifi uswe tukubomba nu Mwanundumiana gwa Kyala.

<sup>184</sup> Umwēne ali pa kiboko kyako ikilo iki, ntulwanongwa, n’gomokelakunyuma. Ngimba ugwe kubombaga fiki nu Mwene? Ugwe kuyoba, “Ena, une ngubikaga Ikyēne pānja.” Loli, kumbukilaga, komma ugwe ukubomba ikyo. Yikayapo injila nayimo, na panandi, linga ugwe uli ntulanongwa, ukuti ugwe ubagile ukukileka ikiyūmba iki nukuya yulayula. Ugwe ukabagila ukubomba ikyēne.

<sup>185</sup> Pilati, ikilo kimo, āgelile ukubōmba ikyēne. Umwēne ābīlikile kuli mīsī gamo kangī umwēne āsukāga amaboko gāke. Alinkuti, “Une ngaya nakyo nakimo ikyakubomba ni Kyēne. Une itolo kifwene bo ngakibonamo siku Ikyēne. Une ngāpīlikēmo siku i Nongwainunu. Une ngulōnda nakimo ikyakubōmba ni Kyēne.” Ngimba umwēne ābagile ukukisuka Ikyēne ukufuma mmfiboko fyāke? Umwēne akābagile.

<sup>186</sup> Kubumalikisyo, umwe mumenye iki kyābonike kwa Pilati? Umwēne ālinkutāga amīnogono gāke. Kangi kubutali mmwanya mu Switzerland, kūko uswe twāli nkyīnja kyākīndāga, tukulūmbilila i Nongwainunu, lilino kalipo akapāngo kaiyolo aka kāyobile, ukuti, kilipo i kitubwi kya mīsi kula, kūko abāndu bikwīsa ukufuma ku kīsu kyōsa, ukukētēsya, ikyinja kilikyōsa, pa kabalilo ka bukomeligwe. Pilāti, umwēne ālisopile mwēne ku bufwe, ukwīsila mu kwīgōga, ukunyēla nkati mmīsi aga nu kwīmīlwisya mwēne. Kangi ikyīnja kilikyōsa, pa lisiku lilalila, amīsi ga mwakinyomo gikukinila mmwanya ukufuma mu kitubwi kila, ukunāngīsya ukuti Kyala āpīkile a mīsi. Amīsi gakabagilamo siku ukusuka i Lilopa Iya Yeso ukufuma mmaboko gako pamo umoyo gwako. Yilipo injila yimoyēne itolo ukubōmba ikyēne, uko ko kwītīkīsya Ilyēne ukuya ubuswe bwāko bwapagwīmwēne nu kuya nsayanisigwa kwa Kyala.

Unko uswe twipute.

<sup>187</sup> Tāta Gwakumwanya, uswe tukukupalisya Ugwe ikilo iki panongwa ya Lisyu. “Kabuno ulwitiko lukwisa nu kupilika, kangī ukupilika ni Lisyu.” Uswe tukupalisya Ugwe panongwa ya Yeso. Kangi bo uswe tukukēta ilisiku ilikulumba ili lilyo uswe tukwītūgalāmo, mūmo fikuti ifimanyilo ni fiswīgo, mūmo uswe tukuleka ifindu ifi ukuselemuka palubafu. Kyala, igula amāso ga bāndu mu kitembe iki, ikilo iki, ukuti abēne babagīle ukukēta nu kupilikisya ukuti uswe tuli mu sala yabumalikisyo. Akabalilo kakupululuka. Uswe tukaya nako kingi fiyo ukuya apa, kangī uswe tukufimbilisigwa ukumbona Yeso. Kangi uswe twisa kufimbilisigwa ukubaligwa bapēsī, kabuno pakayapo nu lulēyo nalumo. Ulubunju ulu, akabalilo kāko Ugwe gwāpēle imboniboni ingulumba yila, iyamaka iya nnyāmbāla yula ukwisa apa, ukufuma kubutali nkīsu kwīsīlya; kangī ukumbona umwēne, ukukinda unsyungulu gwa kwilamwa, ikufyuka ukufuma pa kikota kya magudumu kila, ikwāmbilila ukukēta kwake. Amalundi Gake gikwīsa ukuya gāmaka, ukusuluka ukukinda nkiyumba, ukusangaluka nu kuntufya Kyala. Ikyēne kikunāngīsya ukuti Kyala yo akāli gwakubagila ukufuma ku mabwe aga ukufyūsya abāna kwa Abraham. Ukukēta imboniboni, bo yu Yeso āyobīle, “Une ndikubōmba nakimo mpaka u Tāta ikunāngīsya Une. Une ngabagīla ukubomba nakimo.”

<sup>188</sup> Unnyambala umfwamaso alinkunkonga Umwene, kangī alinkuti, “Yaga ni kisa pa uswe.”

<sup>189</sup> Umwene alinkuti, apalasisye amaso gabo nu kuyoba, “Ukufwana nu lwitiko lwako, kiyeye ikyēne kwa ugwe.”

<sup>190</sup> Lilino, Ntwa, uswe tukuketa Yeso. Uswe tutikuketa ifindu fyosa. Uswe tukukēta uswe tukāli tukwēga abakemesigwe ba uswe ku lipūmba, nu kwēnda pamwanya pa lipūmba Iya yumo nu nnine. Loli uswe tukuketa Yeso, yu ātendike ulufingo. Uswe

tukumbona Umwene na uswe. Komma Yeso mu lipumba, komma Yeso ifyinja maelifu mabili ifi fikindilepo; loli Yeso ikilo iki, uyu ali na uswe. Uswe tukumbona Umwene abonekile mu maka Gake gosa, kangu ifika, ni fiswigo.

<sup>191</sup> Kyala, uswe tulingasūlaga ngamo siku ubu ubukulumba u Bupoki. Lōli uswe tuli ūbatilāga Ikyēne, nu kwītikisya Ikyēne, nu kuya balugīndiko, nu kwītūgāsya pa Kyēne mpaka i lisiku ili Yeso ikwīsa ukwēga uswe ku Kāya. Tupaga ikyene, Ntwa. Uswe tukusuma ikyene mu Ngamu Yake.

<sup>192</sup> Kangu bo uswe twinamisye imitu gyitu pasi, une nguswiga linga alipo umundu mu nyumba ikilo iki, pasi pa Kuyapo Kwakala kwa Mbepo Mwikemo, abagile ukuyoba, “Nkundwe Branham, une mbilikisye ukuti une nsobile. Une mbilikisye ukuti une ndi nsobi. Kyala asetwile kwa une imbibi syāngu. Kangu une mmenye ukuti une ndi nsobi. Une nisakufyūsya ikiboko kyāngu ku Mwēne nu kusūma ikisa, ikilo iki. Kyala, yaga gwakisa kwa une. Une ndi nsobi.” Ngimba umwe mubagile ukubōmba ikyo?

<sup>193</sup> Bo uswe tukugūlila itolo akabalilo, linga alipo umundu apa uyu ikulōnda, kulipo u kōsya kukuyaga pakuyapo pabuyo itolo mu kabalilo. Kangu linga ugwe gwe ntulanōngwa, une āngali ngupinduka. Ngimba ugwe ubagile bulebule ukupika u lugano ulusitakufwānikisigwa bo ulu ulwa Yula uyu āfwile? U Kyala Mwikemo gwa Kumwanya alinkuya Nnyambala umonangi; komma nongwa yakuti Umwēne ātulilw’inongwa, lōli panongwa yakuti Umwēne āli ni mbibi syāko, kangu alinkupimba isyēne kula ku Kalvari. Kangu ugwe utikwitikisya ubo ubuhobokelo? Ngimba ugwe utikubombaga ikyene ikilo iki? Bo uswe twinamisye imitu gyitu pasi, umunduyumo yoba, “Ngumbukilaga une, Nkundwe Branham. Une ngufyusya ifiboko fyāngu kwa Kristi, nu kuyoba, ‘Yaga gwakisa kwa une. Une—une ndi nsobi, kangu une ngulonda ukuya gwakusayana kwa Kyala.’” Ngimba ugwe ubagile ukufyusya ikiboko kyako?

Umma ndaga, linga aligwesa yo Bakristi, polelo, unko uswe twipute.

<sup>194</sup> Tāta, uswe tukukupalisya Ugwe ikilo iki, ukuti aligwesa nkati muno bo Bakristi, ukuti abēne babīkil’ubukēti kilakila ukwīsila mu kusyāla kimyemye, ukuti imbibi syābo syōsa sili pāsi pa Lilopa. Kangu une ngupalisya panongwa ya ikyo. Sayaga abēne, Ntwa. O, une nhōbwike fiyo ukuti abēne balwāgile ulusayano ukwīsila mu bupi bwa Lilopa, ukwīsila mu kupilika i Lisyu. Ukusuka kwa mīsi, ukwīsila mu Lisyu, Ilyēne likusuka uswe. Ikyēne kikutwāla uswe ku buyo ubukulumba ukukīnda, kūko—kūko untulwanongwa, ni ngīsi yāke ingāsi, yitēndekīgwe nyelu bo matalala. I ndōndōbya ingesefu isya mbibi sisukigwe, kangu uswe tuli fipeligwa ifipya mwa Kristi. Mumo uswe tukupalisya ikyo, Ugwe, panongwa ya iki.

Lilino imbombo yalosyo yikwisapo. Une ngupilikisya ukuti unkikulu unkeke uyu, ikilo iki, uyu ukosigwa ukusuluka apa, mu Ngamu ya Ntwa gwake.

<sup>195</sup> O Tāta Gwakumwanya, uswe tukusuma ukuti Ugwe kusayaga unkikulu unkeke uyu. Mūmo ilinogōno lyāngu likugomokela itolo ku masiku manini aga gakindilepo, ngwisapo mu Henryville nu kunketa yula undindwana unnini unganigwa ikwenda ukusyungutula kula pa lukindi. Kangi ikilo iki, umwene yo māma, u nkikulu. Umwene itikisigwe Ugwe ukuya Mpoki gwake gwa pamwene. Bumi buyile bukafu kuli u mwanike uyu, Ntwa, O Kyala, loli ku Mwanya ko kulisimikisigwe kuli umwene. Kangi uswe tukupalisya Ugwe panongwa ya ikyo. Uswe tukusuma, Kyala, ukuti Ugwe kusayaga unkikulu unkeke lilino. Kangi bo umwene ikwisa ukosigwa na misi, Ugwe ulimmwisusyaga umwene na Mbepo Mwikemo gwa Kyala. Tupaga ikylene, Ntwa. Umoyo gwake guli yaga itolo gwikyelile fiyo, nkati Myanya! Tupaga ikylene panongwa ya lwimiko Lwako. Uswe tukusuma ikylene mu Ngamu ya Yeso. Amen.

<sup>196</sup> [Ubuyo busitakandu pa tepi—Nsimbi] Une ngulonda ukubala ukufuma ku Imbombo, untu gwa 2; Peteri ikuyoba, pa Lisiku lya Pentekosti, u losyo lwakwanda ulu lwabombigwemo siku mu Kipanga kya Kikristi. Peteri, ukukemela aba Farisai na bandu bafwamaso, panongwa ya kusita kumwagania u Mwanundumiana gwa Kyala; ukuyoba isya mumo ukuti Kyala ansusisye Umwene pala, nukusimikisya imbombo Syake, mu fika ifikulumba ni fiswigisyo. Pilikisya ku iki, bo umwene ayobile. Umwene afyusyaga Yeso.

<sup>197</sup> Aligwesa u mbepo gwa Kikristi ikufyusya Yeso, komma pa milomo gyene mma, loli nu bumi bwako. Imilomo gyako gibagile ukuyoba ikindu kimo, ubumi bwako bukubomba ikingi. Linga ugwe kubomba ikyo, ugwe umenye iki ikylene kili? Ikyene kyo busyobi. Kangi une po kinunupo ngétane na Kumwanya bo nkanakyala ukukinda ukuya nsyobi. Une angali ngwegwa ulusako lwangu kinunupo, une ngwitika, mu ku Mwanya, ukuya—ukuya nsitakyala, ukukinda ukuya nsyobi. Une naloliloli...Linga ugwe kubikil'ubuketi kuli Yeso nu kuyoba "Umwene yo Mpoki," ugwe kuya mumi bo lula, panongwa yakuti abandu bikugulilaga ikylene ukufuma mwa ugwe. Uko ko kotalusya. Ugwe itugala ngati u Nkristi ikufimbilisigwa ukubomba. Uswe twabukile ukukinda mu ikyo ulubunju ulu.

<sup>198</sup> Lilino, Ntwa itikisyege, kilabo nkilo, pamo...Kitatu nkilo, uswe tukwegaga untu gwa 3, ugu go ntu unswigisye. Kangi lilino, yaga nsisimikisyi ukwisa pa kilo kya Kitatu. Balinga aba bikwikyela u Buku uyu, ugwa kumanyisya kwa sukulu ya Ndungu? [Ikilundilo kikuyoba, "Ameni."—Nsimbi] O, ndaga umwe fiyo. Ikyo kyo kinunu.

199 Lilino, une ngulōnda ukubala lilino ukufuma ku Imbombo, untu gwa 2, ukwanda pa linandi lya 32.

*Uyu Yeso yo Kyala afyusisye mmwanya, kũko uswe . . . tuli baketi. (Abene bamenye ikylene.)*

*Polelo ukuya pa kiboko ikililo ikya Kyala afyũsigwe, kangi ukuya āmbilile ifya Tāta u lufingo lwa Mbepo Mwikemo, Umwēne yo ōnile panja iki, iki umwe lilino muketile nu kupilika.*

200 Lilino pilikisya ku mwēne ikuyoba isya Davidi, yumo mwa bāndúmi.

*Kabuno Davidi akāli akafyũka ku mwānya: lōli umwēne āyobile mwēne, U NTWA āyobile kwa Ntwa gwāngu, Itũgāsya ugwe pa kiboko ikitalusye,*

*Mpaka Une ngupela abalugu bāko kyakukanyilapo kyāko.*

Davidi akābagile ukubũka mmwanya; umwēne āli pāsi pa lilopa ilyonesigwe lya ngwāta ni mbene, kangi i ng’osi. Loli lilino umwene abagiile ukufyuka; umwene aali pasi pa Lilopa lya Ntwa Yeso. Kabuno abēne bikwāmula itolo ku Lilopa akabalilo kāko Ilyēne lyābagile ukwīsa mmaka. Akabalilo kako i Lilopa lya Kristi lisile mmaka, bosa bala bābo bafwiilile mbukūndwe ubununu, balinkusyuka, uko ko kutalusya, kangi bafyũkile nkati ku Lwīmiko.

201 Lilino pilikisya.

*Polelo unko yōsa i nyumba ya Israeli yimanye . . . (Pilikisya ku iki.) . . . ukuti Kyala naloli apelile uyu Yeso yuyuyu, uyu umwe . . . mwākomelile, fyosa-fibili Ntwa na Kristi.*

Bule isya ikyo? Ngimba Umwēne yo Mūndu gwakitatu ugwa butātu, pamo yo Umwēne u butātu bōsa? Umwene yo bwisusye bosa bwa Bwakyala, mumbili.

202 Kikayapo ni kindu kimo bo ba Kyala batatu: Kyala u Tāta, Kyala u Mwanundumiana, kangi Kyala u Mbepo Mwikemo. Ikyo kyo kikaya nukuya mu Lisimbo mma, nakumo. Nakumo kiliko ikyēne. Nakumo uswe twālagililigwēmo siku ukōsya “mu ngamu ya Tāta, kangi mu ngamu ya Mwanundumiana, kangi i ngamu ya Mbepo Mwikemo,” komma nakumo mu Masimbo. Ikyene kyo kimanyisyo kya kiKatolika, kangi ikylene kikaya kya kipanga kya Protestanti. Une ngunsuma aligwesa ukunsosolela une i Lisimbo limo kũko umundu gwea alyōsigwēmo siku mu njila iyingi yiliyosa ukukinda mu Ngamu ya Ntwa Yeso Kristi. Isaga, nngisya ikylene kwa une, kangi une ngubikaga ikimanyilo pa nyuma yangu, “U nsyobi, kangi u nsololi gwabutungulu, u manyisi gwabutungulu,” nu kubuka ukukinda mu ngindi. Kikayapo ni kindu ikya luko nakimo. Nasiku alipo yumo uyu

ályosisye mu njila yila. Ikyene kyo kimanyisyo kya kiKatolika, kangi komma ikimanyisyo kya kiProtestanti.

203 “Matai 28:19,” umwe mukuyoba, “Yeso áyobíle, ‘Búka umwe polelo nkísu kyósa, manyisya ifikolo fyósa, ukósa abéne mu Ngamu ya Tāta, Mwanundumiana, kangi Mbepo Mwikemo.” Uko ko kutalusya.

Lōli komma, “Mu ngamu ya Tāta, ngamu ya Mwanundumiana, ngamu ya Mbepo Mwikemo.” I *Ngamu* ya Tāta, i *Ngamu* (komma ingamu-nyingi), iya Tāta . . .

*Tāta* yikaya ngamu. Balinga bamenye ikyo? Balinga aba tāta bali apa? Fyusya ifiboko fyinu. Balinga abanabalumiana bali apa? Fyusya ikiboko kyako. Balinga aba bandu bali apa? Fyusya ifiboko fyinu. Filikanunu. Lilino, ngimba ingamu yako yo fiki? Komma tāta, mwanundumiana, pamo mundu.

204 U nkíkūlu áyobíle kwa une akabalilo kamo, uyu āli mūmilisi gwa bakyala-batatu, umwene alinkuti, “Nkundwe Branham, loli u Mbepo Mwikemo yo ngamu.”

205 Une ndinkuti, “Mbepo Mwikemo yikaya ngamu, u Mbepo Mwikemo kyo iki Ikyene kili. Ikyēne *yo* Mbepo Mwikemo, yikaya ngamu, ikyo kyo iki Ikyene kili. Une ndi mundu, loli ingamu yangu yikaya mundu mma, ingamu yangu yo William Branham.”

206 Polelo, linga Umwene áyobíle, “Búka umwe polelo, manyisyaga ifikolo fyósa, ukubosya abene mu *Ngamu* ya Tāta, kangi ya Mwanundumiana, kangi ya Mbepo Mwikemo,” polelo Peteri, amasiku kalongo ukukonga, alinkuti, “Pinduka,” lilino, apa, pilikisya ku iki:

*Kangi akabalilo kāko abēne bāpilike iki, abēne balinkulasigwa ku ndūmbūla syābo, kangi balinkuyoba kwa Peteri na . . . abangi ba batumigwa, Banyambala na bakundwe, ngimba uswe tukubombaga fiki?*

*Polelo Peteri alinkuyoba ku bēne, Pinduka, aligwesa gwa umwe, kangi mosigwege mu ngamu ya Ntwa Yeso Kristi ku buswe bwa mbibi syinu, kangi umwe mwisa kwambililaga ikyabupi kya Mbepo Mwikemo.*

207 Polelo ngimba Peteri ābombíle iki Yeso ālimbūlile umwēne ukusita kubōmba? Umwēne akāfuluganikéne mma, uswe twe tuli bafuluganike bala.

208 Pa Imbombo 2:38, abaYuda balyósigwe mu Ngamu ya Ntwa Yeso Kristi, ukwisila mu kuyubika.

Mu Imbombo, untu gwa 8, uswe tukusyāgánia ukuti Filipu ābukíle nukulumbilíla ku baSamaria, nu kubósyā abēne mu Ngamu ya Ntwa Yeso Kristi, ba kiSamaria.

Mu Imbombo 10:49, Peteri alinkulagíla a Bāpanja ukósigwa mu Ngamu ya Ntwa Yeso Kristi.

209 Pauli, Imbombo 10:5, “Umwène ākīndīle ukwisila ifiloboko fyapamwanya ifya Efesi, umwène ikubāga abafundigwa.” Abene baali bamanyili ba kiBaptisti; baali, aligwesa, ba Baptisti. Abēne bāpindusīgwe pāsi pa ndumbilili gwa kiBaptisti ukwisila mu ngamu ya—ya, muketile, Apollosi. Kangi umwène āli ndumbilili gwa kiBaptisti, “Kangi āsisimikisyaga ukwisila mu i Bāngéli ukuti Yeso āli yo Kristi.”

Pauli āyobīle, “Ngimba umwe mwāmbilīle u Mbepo Mwikemo ukufuma pāpo umwe mwālitīke?”

210 Abene balinkuti, “Uswe tukamanya mma kali aliko yumo u Mbepo Mwikemo.”

211 Alinkuti, “Polelo ngimba umwe mwālyōsīgwe bulebule?”


212 Abene balinkuti, “Uswe tosīgwe nu nnyambala yulayula uyu āmōsyāga Yeso, ikibwina kya misi panja pala. Ikyo kyo kinunu kifwene.”

213 Pauli āyobīle, “Ikyo kitisakubōmba lilino. Umwe mukufimbilisigwa ukōsīgwa, ukwandisya kangi.” Kangi Pauli alinkubalagila abēne ukōsīgwa, kabili kangi, mu Ngamu ya Ntwa Yeso Kristi. Alinkubīka amaboko gāke pa bēne, kangi u Mbepo Mwikemo ikwisa pa bēne. Kotalusya. Ena, nkulumba.

Ukwene kwisakuyaga Bwelu nkabalilo ka  
namayolo,  
Injila ya Lwīmīko ugwe naloliloli kwisakwāga;  
Mu njila ya mmīsi, ulo lo Bwēlu umwīsyūgu,  
Ukusyiligwa mu Ngamu imbala iya Yeso.  
Bakeke na bakāngāle, pinduka ku mbībi syīnu  
syōsa,  
U Mbepo Mwikemo isakwingilaga naloli;  
U Lumuli lwa kunamayolo lwīsīle,  
Ikyene kyo fundo ukuti Kyalala na Kristi bali  
Yumo.

214 Ikyo kyo iki i Bāngéli lyāyobīle. Uko ko kotalusya. Iyene yo sala, akēne ko kabalilo aka uswe tukufimbilisigwa ukupinduka.

215 Būla, ywēga akabalilo kāko ugwe gwītendekisyē, nkitubwi. Kangi uswe twisa... [Unkundwe ikuyoba, “Uswe twītendekīsyē.”—Nsimbi] Umwe mwītendekisyē? Umma ndaga, ukukwaba ifikingo.

216 Lilino, u Ntwa akusaye ugwe lilino, bo nkundwe ikubōmbēla ulosyo. Ngimba umwe mwesa mubagile ukuketa kuno? 



57-0825E Bahiburi, Untu Gwakibili #2  
Kitembe Kya Branham  
Jeffersonville, Indiana U.S.A.

KYANGONDE

©2024 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Ukusasania isya kwegelelakwegelela

Ukusoka isya kwegelelakwegelela. Ubwabuke bosa bukanisigwe. Ilibuku ili libagile ukubindikisigwa mfikalatasi pa kompyuta ya kunyumba ukuti ufibombelege imbombo yuyugwe pamo ukubayabilako abangi, kisita kuhombigwa, fiyege fyombo fyakubombela imbombo pakusasania Inongwa inunu isya Yeso Kristi. Ilibuku ili likabagila ukuulisigwa, pamo ukubindigwa ukuti gayege mingimingi, pamo ukusanusigwa pa webusaiti, pamo ukubikigwa mmakina agakusungasunga, pamo ukusanusigwa mu ndimi isingi, pamo ukulibombela imbombo iyakusyagilamo ihela kisita kwitikisigwa mwakalata unsimbigwe ugwa Voice Of God Recordings®.

Linga kulonda upilike inyingi pamo ifyombo ifingi ifi filipo ulisimbilaga ku:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)